

四庫全書

史部

欽定四庫全書

元史卷四十二

明翰林學士亞中大夫知制誥兼修國史宋濂等修

本紀第四十二

順帝五

九年春正月丁酉享于太廟癸卯立山東河南等處行  
都水監專治河患乙巳廣西徭賊復陷道州萬戶鄭均  
擊走之丙午命中書平章政事台哈布哈提調會同館

庚戌太白犯建星辛亥太白犯平道二月戊辰祭社稷  
辛巳台哈布哈辭職不允甲申太陰犯建星三月丁酉  
壩河淺澁以軍民各一萬濬之己亥太白犯壘壁陣乙  
巳命大司農達實特穆爾為湖廣行省平章政事是月  
河北潰陳州麒麟生不乳而死搖賊吳天保復寇沅州  
夏四月丁卯享于太廟丁丑以知樞密院事奇徹台為  
中書平章政事己卯以燕南廉訪使韓元善為中書左  
丞立鎮撫司於直沽海津鎮壬午以河間鹽運司水災

住煎鹽三萬引是月車駕時巡上都五月戊戌命太傅  
托克托提調大鄂爾多內史府庚子詔修黃河金堤民  
夫日給鈔三貫辛丑罷瑞州路上高縣長官司庚戌命  
翰林國史院等官薦舉守令丙辰定守令督攝之法路  
督攝府府督攝州州督攝縣是月白茅河東注沛縣成  
巨浸蜀江大溢浸漢陽城民大饑六月丙子刻小玉印  
以至正珍祕為文凡祕書監所掌書盡識之秋七月庚  
寅監察御史沃呼海壽劾殿中侍御史哈瑪爾及其弟

舒蘇罪惡御史大夫韓嘉納以聞不省章三上詔奪哈瑪爾舒蘇官出海壽為陝西廉訪副使韓嘉納為宣政院使壬辰詔命太子阿裕爾實哩達喇習學漢人文書以李好文為諭德歸暘為贊善張仲為文學李好文等上書辭不許賜公主布達實哩平江田五十頃甲午以額森特穆爾為御史大夫乙未以湖廣行省左丞相琳沁巴勒知樞密院事丙午太陰犯壘壁陣癸丑太陰犯天關甲寅以巴延為集賢大學士乙卯罷右丞相多爾濟

仍為國王左丞相太平為翰林學士承旨是月大霖雨水沒高唐州城江漢溢壞民居禾稼閏月辛酉詔托克托為中書左丞相仍太傅韓嘉納為江浙行省平章政事庚午以伊克扎爾古齊吹斯戡為中書右丞同知樞密院事伊蘇烏爾圖華為中書參知政事辛巳詔赦湖廣徭賊註誤者戊子命岐王阿爾奇鎮西番八月甲辰以集賢大學士巴延為中書平章政事河南行省平章政事伊魯布哈為宣政院使庚戌以司徒雅克布哈提

調太史院知經筵事是月車駕還自上都九月甲子凡  
言中外利害者詔委官選其可行之事以聞丙寅命平  
章政事已延提調留守司丙子中書平章政事鼎珠以  
疾辭職不允辛巳命知樞密院事琳沁巴勒提調武備  
寺丙戌熒惑犯靈臺是月遣御史中丞李獻祀河瀆冬  
十月辛卯享于太廟丁酉命皇太子阿裕實哩達喇自  
是日為始入端本堂肄業命托克托領端本堂事司徒  
雅克布哈知端本堂事堂虛中座以候至尊臨幸太子

與師傅分東西向坐授書其下僚屬以次列坐十一月  
戊午朔日有食之戊辰太陰犯畢宿庚辰太白犯壘壁  
陣十二月戊戌太白復犯壘壁陣丁未彘賊吳天保陷  
辰州是歲詔汰冗官均俸祿賜致事官及年高帛漕運  
使賈魯建言便益二十餘事從其八事其一曰京畿和  
糴二曰優卹漕司舊領漕戶三曰接運委官四曰通州  
總治豫定委官五曰船戶困於壩夫海運壞於壩戶六  
曰疏濬運河七曰臨清運糧萬戶府當隸漕司八曰宜



以宣忠船戶付本司節制冀寧平遙等縣曹七七反命刑部郎中巴克實兵馬指揮沙布鼎討平之

十年春正月丙辰朔日中書右丞吹斯戩為平章政事  
伊蘇烏爾圖華為中書右丞壬戌立四川容美洞軍民  
總管府壬申太陰犯熒惑甲戌隕石棣州色黑中微有  
金星先有聲自西北來至州北二十里乃隕二月丙戌  
詔加封天妃父種德積慶侯母育聖顯慶夫人辛丑太  
陰犯平道甲辰太陰犯鍵閉三月己卯熒惑犯太微垣

是月奉化州山石裂有禽鳥草木山川人物之形夏四月己丑左司都事武祺建言更鈔法丁酉赦天下詔曰朕纂承洪緒撫臨萬邦夙夜厲精靡遑暇逸比緣倚注失當治理乖方是用圖任一相俾贊萬幾爰命托克托為中書右丞相統正百官允釐庶績曾未朞月百度具舉中外協望朕甚嘉焉尚慮軍國之重民物之繁政令有未孚生意有未遂可赦天下丙午太白犯鬼宿是月車駕時巡上都六月壬子有星大如月入北斗震聲若

雷三日復還秋七月辛酉太陰犯房宿癸亥以大護國  
仁王寺昭應宮財用規運總管府仍屬宣政院辛未太  
白晝見丁丑太白復晝見八月壬寅車駕還自上都九  
月癸丑朔太白晝見辛酉祭三皇如孔子禮先是歲祀  
以醫官行事江西廉訪使文殊訥建言禮有未備乃勅  
工部具祭器江浙行省造雅樂太常定儀式翰林撰樂  
章至是用之壬戌熒惑犯天江庚午命樞密院以軍士  
五百修築白河堤壬午托克托以吏部選格條目繁多

莫適據依銓選者得以高下之請編類成書從之冬十月癸巳歲星犯軒轅乙未吏部尚書僕哲篤建言更鈔法命中書省御史臺集賢翰林兩院之臣集議之丙申太陰犯昴宿辛丑置諸路寶泉都提舉司於京城是月大名東平濟南徐州各立兵馬指揮司以捕上馬賊十一月壬子朔日有食之丙辰以高麗瀋王之孫托克托布哈等為東宮集賢官辛酉罷遼陽濱海民煎熬野鹽戊辰太陰犯鬼宿己巳詔天下以中統交鈔壹貫文權

銅錢千文準至元寶鈔貳貫仍鑄至正通寶錢並用以  
實鈔法至元寶鈔通行如故是月三星隕于耀州化為  
石如斧形削之有屑擊之有聲十二月壬午朔修大都  
城辛卯以大司農圖嚕等兼領都水監集河防正官議  
黃河便益事命前同知樞密院事巴延布哈等討廣西  
搖賊己未太陰犯鬼宿己酉方國珍攻温州是歲京師  
麗正門樓上忽有人妄言災禍鞠問之自稱薊州人已  
而不知所往

十一年春正月乙卯享于太廟丙辰辰星犯牛宿庚申  
命江浙行省左丞博囉特穆爾討方國珍丁卯蘭陽縣  
有紅星大如斗自東南墜西北其聲如雷己卯命吹斯  
戩提調大都留守司二月庚寅太陰犯鬼宿乙未太陰  
犯太微丁酉太陰犯亢宿是月命遊皇城巾書省臣諫  
止之不聽立湖南元帥府分府于寶慶路三月庚戌立  
山東分元帥府于登州丙辰親策進士八十三人賜圖  
烈圖文允中進士及第其餘賜出身有差壬戌徵建寧

處士彭炳為端本堂說書不至丁卯太陰犯東咸戊辰太陰犯天江是月遣使賑湖南北被寇人民死者鈔五錠傷者三錠燬所居屋者一錠夏四月壬午詔開黃河故道命賈魯以工部尚書為總治河防使發汴梁大名十三路民十五萬廬州等戍十八翼軍二萬自黃陵岡南達白茅放于黃固哈只等口又自黃陵西至陽青村合于故道凡二百八十里有奇仍命中書右丞伊蘇烏爾圖華同知樞密院事哈斯以兵鎮之冀寧路屬縣多

地震半月乃止乙酉享于太廟詔加封河瀆神為靈源  
神祐弘濟王仍重建河瀆及西海神廟改永順安撫司  
為宣撫司丁酉孟州地震庚子罷海西遼東道巡防捕  
盜所立鎮寧州辛丑師壁安撫司土官田驢什用盤順  
府上官墨奴什用降立長官司四巡檢司七乙巳彰德  
路雨雹形如斧傷人畜是月罷沂州分元帥府改立兵  
馬指揮使司復分司于膠州車駕時巡上都五月己酉  
朔日有食之辛亥潁州妖人劉福通為亂以紅巾為號



臨潁州初樂城人韓山童祖父以白蓮會燒香惑衆謫徙廣平永平縣至山童倡言天下大亂彌勒佛下生河南及江淮愚民皆翕然信之福通與杜遵道羅文素盛文郁王顯忠韓咬兒復鼓妖言謂山童實宋徽宗八世孫當為中國主福通等殺白馬黑牛誓告天地欲同起兵為亂事覺縣官捕之急福通遂反山童就擒其妻楊氏其子韓林兒逃之武安癸丑文水縣雨雹壬申命同知樞密院事圖沁以兵討劉福通授以分樞密院印丙

子命大都至汴梁二十四驛凡馬一匹助給鈔五錠六月發軍一千從直沽至通州疏濬河道是月劉福通據朱皋攻破羅山真陽確山遂犯舞陽葉縣等處江浙左丞傅囉特穆爾為方國珍所敗秋七月丙辰廣西大水丁巳罷四川達努管勾洞長官司改立忠孝軍民府己未太陰犯斗宿壬戌太陰犯右執法己巳太白犯左執法熒惑入鬼宿是月開河功成乃議塞決河命大司農達實特穆爾及江浙行省參知政事樊執敬浙東廉訪

使董守懋招諭方國珍八月丁丑朔中興路地震戊寅  
祭社稷乙酉太陰犯天江丙戌蕭縣李二及老彭趙君  
用攻陷徐州李二號芝蔴李與其黨亦以燒香聚衆而  
反是月車駕還自上都蘄州羅田縣人徐貞一名壽輝  
與黃州麻城人鄒普勝等以妖術陰謀聚衆遂舉兵為  
亂以紅巾為號九月戊申以中書平章政事多爾濟巴  
勒提調宣文閣知經筵事平章政事鼎珠提調會同館  
壬子命御史大夫額森特穆爾知樞密院事及衛王庫

春格爾總率大軍討河南妖寇各賜鈔一千錠從征者  
賜予有差乙卯辰星犯左執法丁巳太白犯房宿壬戌  
詔以高麗國王布達實哩之弟已延特穆爾襲其王封  
布達實哩之子遂廢戊辰太陰犯鬼宿是月劉福通陷  
汝寧府及息州光州衆至十萬徐壽輝陷蘄水縣及黃  
州路冬十月戊寅熒惑犯太微垣己卯享于太廟辛巳  
太陰犯斗宿癸未立寶泉提舉司于河南行省及濟南  
冀寧等路凡九江浙江西湖廣行省等處凡三命知樞

密院事婁章以兵同額森特穆爾討河南妖寇乙酉太白犯斗宿己丑太白晝見熒惑犯歲星辛卯太白犯斗宿立中書分省于濟寧癸巳歲星犯右執法癸卯以宗王神保克復睢寧虹縣有功賜金帶一從征者賞銀有差丙午熒惑犯左執法是月天雨黑子于饒州大如黍菽徐壽輝據蘄水為都國號天完僭稱皇帝改元治平以鄒普勝為太師十一月癸丑有星孛于婁宿甲寅孛星見于胃宿乙卯丙辰亦如之丁巳太陰犯填星孛星

微見于畢宿黃河堤成散軍民役夫庚午監察御史齊  
齊克特穆爾等言右丞相托克托治河功成宜有異數  
以旌其勞甲戌江西妖人鄧南二作亂攻瑞州總管約  
蘇卜擒斬之是月以治河成功告祭河伯召賈魯還朝  
起授榮祿大夫集賢大學士賜金繫腰一銀十錠鈔千  
錠幣帛各二十匹都水監并有司官有功者三十七員  
皆遷其職詔賜托克托達爾罕之號俾世襲之以淮安  
路為其食邑命立河平碑十二月丙子朔太白晝見丁

丑太白經天己卯立河防提舉司隸行都水監庚辰太白經天是夜犯壘壁陣甲申太陰犯填星丙戌太白復經天是夜復犯壘壁陣以治書侍御史烏克遜良楨為中書參知政事辛卯太白經天壬辰復如之丁酉太白晝見太陰犯熒惑命托克托於淮安立諸路捕鷹房民匠錢糧總管府秩從三品庚子太白經天辰星犯天江辛丑太白經天額森特穆爾復上蔡縣擒韓咬兒等至京師誅之壬寅太白晝見是歲括馬

十二年春正月丙午朔詔印造中統元寶交鈔一百九十萬錠至元鈔十萬錠戊申竹山縣賊陷襄陽路總管柴肅死之是日荆門州亦陷己酉時享太廟庚戌以宣政院使伊魯布哈為中書平章政事壬子中書省臣言河南陝西腹裏諸路供給繁重調兵討賊正當春首耕作之時恐農民不能安於田畝守令有失勸課宜委通曉農事官員分道巡視督勸守令親詣鄉都省諭農民依時播種務要人盡其力地盡其利其有曾經盜賊水



患供給之處貧民不能自備牛種者所在有司給之仍  
令總兵官禁止屯駐軍馬毋得蹈踐以致農事廢弛從  
之乙卯淮東宣慰司添設同知宣慰司事及都事各一  
員丙辰徐壽輝遣偽將丁普即徐明遠陷漢陽丁巳陷  
興國府己未徐壽輝遣鄒普勝陷武昌威順王庫春布  
哈湖廣行省平章政事和尚棄城走刑部尚書阿魯收  
捕山東賊給勅牒十一道使分賞有功者辛酉徐壽輝  
偽將魯法興陷安陸府知府起爾戰不勝死之癸亥刑

部添設尚書侍郎郎中員外郎各一員五愛滿添設呼  
拉干齊一百名乙丑太陰犯熒惑丙寅以河復故道大  
赦天下己巳歲星犯右執法辛未徐壽輝兵陷沔陽府  
壬申中興路陷山南宣慰司同知譚古埒實領兵出戰  
衆潰宣慰司錦州布哈山南廉防使布琳尼敦皆遁走  
是月命還魯魯曾為淮東添設元帥統領兩淮所募鹽丁  
五千討徐州拘刷河南陝西遼陽三省及上都大都腹  
裏等處漢人馬命四川行省平章政事伊魯特穆爾為

總兵官與四川行省右丞長吉討興元金州等處賊宣  
政院同知僧格領伊都呼輝和爾軍與荆湖北道宣慰  
使多爾濟巴勒同守襄陽濟寧兵馬指揮使寶通統領  
右都衛軍從知樞密院事伊徹察喇討徐州二月乙亥  
朔詔許溪洞蠻搖自新丁丑以集賢大學士賈魯為中  
書添設左丞以河南廉訪使哈刺多爾濟為荆湖北道  
宣慰使都元帥守襄陽癸未命諸王圖沁領從官百人  
馳驛守揚州賜金一錠鈔一千錠命寧王英實鎮守四

川賜鎮南王博囉布哈鈔一萬錠甲申鄒平縣馬子昭  
為亂捕斬之乙酉徐壽輝兵陷江州總管李黼死之遂  
陷南康路丙戌霍州靈石縣地震徐壽輝兵陷岳州房  
州賊陷歸州戊子詔徐州內外羣聚之衆限二十日不  
分首從並與赦原置安東安豐分元帥府己丑游皇城  
庚寅太陰犯太微垣癸己太陰犯氐宿辛丑鄧州賊王  
權張春陷豐州龍鎮衛指揮使溫都爾哈瑪爾等討復  
之褒贈仗節死義宣徽使特穆爾等二十七人壬寅以

御史大夫納琳為江南行臺御史大夫仍太尉命翰林學士承旨巴拉與諸王布呼齊領軍守大名癸卯命中書平章政事伊魯布哈知經筵事左丞賈魯叅知政事特哩特穆爾烏克遜良楨並同知經筵事是月賊侵滑濬起德珠為河南右丞守東明德珠時致仕于家聞命馳至東明浚城隍嚴備禦賊不敢犯徐壽輝偽將歐祥陷袁州命特哩特穆爾以中書叅知政事分省濟寧三月乙巳朔追封太師忠王滿濟勅噶台為德王丁未徐

壽輝偽將許甲攻衡州洞官黃安撫敗之徐壽輝偽將  
陶九陷瑞州總管約蘇卜萬戶張岳敗之壬子河南左  
丞相台哈布哈克復南陽等處癸丑中書省臣請行納  
粟補官之令凡士庶果能為國宣力自備糧米供給軍  
儲者照依定擬地方實授常選流官依例陞轉封廕及  
已除茶鹽錢穀官能再備錢糧供給軍儲者驗見授品  
級改授常流從之戊午太陰犯進賢辛酉命親王阿里  
瑪以兵討商州等處賊以衮布巴勒知行樞密院事壬

戊太陰犯東咸甲子徐壽輝僞將項普略陷饒州路遂  
陷徽州信州四川未附生蠻向亞甲洞主墨得什用出  
降立盤順府丁卯江南行臺御史大夫特默格乞致仕  
不允以為甘肅行省平章政事以出征馬少出幣帛各  
一十萬匹於迤北萬戶千戶所易馬戊辰太白晝見詔  
南人有才學者依世祖舊制中書省樞密院御史臺皆  
用之中書省臣言張理獻言饒州德興三處膽水浸鐵  
可以成銅宜即其地各立銅冶場直隸寶泉提舉司宜

以張理就為銅冶場官從之以江浙行省左丞相琳沁  
巴勒為江西行省左丞相領兵收捕饒信賊庚午詔隨  
朝一品職事及省臺院六部翰林集賢司農太常宣政  
宣徽中政資正國子秘書崇文都水諸正官各舉循良  
材幹智勇兼全堪充守令者二人知人多者不限員數  
各處試用守令並授兼管義兵防禦諸軍鄂囉勸農事  
所在上司不許擅差守令既已優陞其佐貳官員比依  
入廣例量陞二等任滿驗守令全治者與真授不治者



全削二等依本等叙半治者減一等叙雜職人員其有知勇之士並依上例凡除常選官於殘破郡縣及迫近賊境之處陞四等稍近賊境陞二等是月方國珍復劫其黨下海入黃巖港台州路達嚕噶齊台哈布哈率軍與戰死之隴西地震百餘日城郭頽夷陵谷遷變定西會州靜軍莊浪尤甚會州公宇墻崩獲弩五百餘張長者丈餘短者九尺人莫能挽改定西為安定州會州為會寧州定軍民官不守城池之罪閏三月辛巳以台州

路達魯噶齊台哈布哈為江浙行省參知政事行台州  
路事命下台哈布哈已死壬午以大理宣慰使達實巴  
圖爾為四川行省添設叅知政事與本省平章政事耀  
珠討山南湖廣等處賊乙酉徐壽輝偽將陳普文陷安  
吉鄉民羅明遠起義兵復之命工部尚書多喇兵部侍  
郎瑪們和車分詣上都察汗諾爾集寧等處給出征河  
南達勒達軍糧立淮南江北等處行中書省治揚州兼  
轄高郵淮安滁州和州廬州安豐安慶蘄州黃州壬辰

以大都留守諤格實為江浙行省添設右丞討饒信賊  
丙申阿蘇愛滿阿爾納古爾台擒滑州開州賊韓烏努  
勒噶有功授資用庫大使丁酉湖廣行省參知政事鐵  
傑以湖南兵復岳州戊戌詔淮南行省設官二十五員  
以翰林學士承旨鴻和爾布哈湖廣平章政事實勒們  
並為平章政事淮東元帥曼濟為右丞燕南廉訪使秦  
從德為左丞陝西行臺侍御史遠實名山北廉訪使趙  
璉並為參知政事庚子以樞密副使烏蘭哈達為中書

添設叅知政事同知經筵事辛丑命淮南行省平章政  
事鴻和爾布哈提調鎮南王傳事是月詔四川行省平  
章政事耀珠以兵東討荆襄賊克復忠萬夔雲陽等州  
命江西行省左丞相琳沁巴勒以兵分守江東西關隘  
命諸王琳沁巴勒安班叅知政事額森特穆爾與陝西  
行省平章政事伊嚕特穆爾討南陽襄陽賊刑部尚書  
阿嚕討海寧賊江西行省右丞和尼齊與叅知政事托  
迪討江西賊以浙東宣慰使思寧普代江浙行省左丞

尊達實哩守蕪湖命江西行省右丞諤格實江浙行省  
左丞羅羅與星吉布延持穆爾曼濟哈雅同討饒信等  
處賊方國珍不受招安之命命江浙左丞尊達實哩討  
之命典瑞院給淮南行省銀字圓牌三面驛券五十道  
詔江西行省左丞相琳沁已勒淮南行省平章政事鴻  
和爾布哈江浙行省左丞尊達實哩湖廣行省平章政  
事額森特穆爾四川行省平章政事巴克實呼圖克及  
江南行臺御史大夫納琳與江浙行省官並許以便宜

行事額森特穆爾駐軍沙河軍中夜驚軍潰退屯朱仙  
鎮詔以中書平章政事曼濟代總其兵額森特穆爾還  
京師仍命為御史大夫夏四月癸卯朔日有食之江西  
臨川賊鄧忠陷建昌己酉時享太廟甲寅以御史大夫  
吹斯戡為中書平章政事提調留守司乙卯鐵傑及  
萬戶陶夢楨復武昌漢陽尋再陷丙辰江西宜黃賊塗  
佑與邵武建寧賊應必達等攻陷邵武路總管吳阿勒  
坦布哈以兵討之千戶魏淳以計擒塗佑應必達復其

城辛酉翰林學士承旨呼圖克哈雅乞致任不允授中書平章政事四川行省參知政事僧格實哩復渠州甲子翰林學士承旨歐陽玄以湖廣行省右丞致仕賜玉帶及鈔百錠給全俸終其身戊辰諸王圖沁特穆爾平章政事額森特穆爾討和州有功各賜金繫腰并鈔千錠辛未荆門知州聶炳復荆門州平章政事呼圖克哈雅年老有疾詔免其朝賀是月大駕時巡上都永懷縣賊陷桂陽耀珠復歸州進攻峽州與峽州總管趙余禱

大破賊兵誅賊將李太素等遂平之詔天下完城郭築隄防命伊都呼伊魯特穆爾領輝和爾軍馬同豫王喇特納實哩知樞密院事婁章討襄陽南陽鄧州賊陝西行臺監察御史蒙果勒哈雅范文等糾言額森特穆爾喪師辱國乞明正其罪詔不允左遷西臺御史大夫多爾濟巴勒為湖廣行省平章政事蒙古勒哈雅十二人為各路添設佐貳官五月癸酉朔太白犯鎮星戊寅命龍虎山張嗣德為三十九代天師給印章海道萬戶李



世安建言權停海漕夏運從之命江南行臺御史大夫  
納琳給宣勅與台州民陳子由楊恕卿趙士正戴甲令  
集民丁夾攻方國珍已卯耀珠復中興路庚辰監察御  
史齊齊克特穆爾等言河南諸處羣盜輒引亡宋故號  
以為口實宜以瀛國公子和尚趙完普及親屬徙沙州  
安置禁勿與人交通從之罷忒兒棚等處金銀場課癸  
未建昌民戴良起鄉兵克復建昌乙酉命留守特默格  
與諸王多爾濟守口北龍慶州是月達實巴圖爾至荆

門增募兵趨襄陽與賊戰大敗克之命尊達實哩仍守蕪  
湖險隘六月丙午中書省臣言大名路開滑濬三州  
元城十一縣水旱蟲蝗饑民七十一萬六千九百八十  
口給鈔十萬錠賑之戊申命治書侍御史杜秉彝中書  
叅議李稷並兼經筵官辛亥太白犯井宿河南行省左  
丞薩納勒叅知政事王伊蘇岱爾並以失誤軍需左遷  
添設淮西宣慰使隨軍供給命河南行省平章政事圖  
魯叅知政事李猷供給汝寧軍需丁巳賜中書叅知政

事烏蘭哈達珠衣并帽乙丑宣讓王特穆爾布哈諸王  
奇塔特奇凌特穆爾及淮南廩訪使班珠爾並平賊有  
功賜金繫腰銀鈔有差紹慶宣慰使楊伊埒布哈遙授  
湖廣左丞楊巴延布哈為紹慶宣慰使換文資楊城為  
沿邊溪洞招討使兼征行萬戶回賜先所拘收牌面丙  
寅紅巾周伯顏陷道州修太廟西神門秋七月丁丑時  
享太廟庚辰饒徽賊犯昱嶺關陷杭州路辛巳命通政  
院使達爾瑪實哩與樞密副使圖沁布哈討徐州賊給

勅牒三十道以賞功己丑湘鄉賊陷寶慶路庚寅以殺  
西番首賊功賜岐王阿爾奇巴鈔千錠邠王烏呼諸王  
班迪沙克嘉平章政事索諾木巴勒各金繫腰一以征  
西元帥幹魯為章佩添設少監討徐州托克托請親討  
徐州許之辛卯命托克托台為行樞密院使提調二十  
萬戶賜金繫腰一銀鈔幣帛有差丁酉辰星犯靈臺以  
杜彛為中書添設叅知政事湖南元帥副使蘇爾約蘇  
哈雅總管烏雅思忠復寶慶路是月徐壽輝偽將王善

康壽四江二蠻等陷福安寧德等縣八月癸卯命中書  
叅知政事特哩特穆爾淮南行省右丞曼濟供給托克  
托行軍一應所需方國珍率其衆攻台州城浙東元帥  
伊德默色福建元帥哈迪爾擊退之甲辰以同知樞密  
院事哈瑪爾為中書添設右丞齊王實勅們獻馬萬五  
千匹于京師賜托克托金三錠銀三十錠鈔萬錠幣帛  
各千匹丁未日本國白高麗賊過海剽掠稱島居民高  
麗國王巴延特穆爾調兵勦捕之賜金繫腰一鈔二

千錠已酉命知樞密院事約約中書平章政事吹斯戩  
伊克扎爾古齊福壽並從托克托征徐州賜金繫腰及  
銀鈔幣帛有差翰林學士承旨庫春鎮遏五投下百姓  
賜金繫腰一壬子以扎薩古遜為河南行省右丞偁哲  
篤為淮南行省左丞各賜鈔五十錠丙辰以圖薩默色  
為淮南行省平章政事丁巳命中書平章政事布哈知  
經筵事托克托將出師六部尚書穆爾瑪哈穆特等上  
言大臣天子之股肱中書庶政之根本不可以一日離

乞留賢相弼亮天工如此則內外有兼治之宜社稷有倚重之寄不報托克托言皇后鄂爾多斯支用不敷繼自今每年宜給金十錠銀五十錠以同知樞密院事舒蘇出軍南陽同知樞密院事圖沁出軍河南皆有功各進階榮祿大夫中書左丞哈瑪爾進階榮祿大夫庚申命哈瑪爾等提調各集賽各愛滿口糧丁卯太白犯歲星詔托克托以達爾罕太傅中書右丞相分省于外督制諸處軍馬討徐州中書省樞密院御史臺分官屬從

行稟受節制爵有功誅有罪綏順討逆悉聽便宜從事  
是日發京師是月大駕還大都安陸賊將俞君正復陷  
荊門州知州聶炳死之賊將黨仲達復陷岳州九月乙  
亥俞君正復陷中興耀珠領兵與戰于樓臺敗績奔松  
滋本路判官上都死之己卯監察御史及河南分御史  
臺行樞密院河南廉訪司鞏昌總帥府陝西都府義兵  
萬戶府等官交章言御史大夫額森特穆爾出征河南  
功績庚辰賜額森特穆爾金繫腰一金一錠銀十錠鈔



五千錠幣帛各百匹癸未中興義士范忠偕荆門僧李智率義兵復中興路俞君正敗走龍鎮衛指揮使溫都爾哈瑪爾領兵入城耀珠自松滋還屯兵于石馬乙酉托克托至徐州丁亥命知行樞密院事阿爾奇從托克托征討賜金繫腰一金一錠銀五錠鈔帶有差辛卯托克托復徐州屠其城芝蔴李等遁走壬辰太陰犯軒轅戊戌賜哈瑪爾鈔三百錠買玉帶己亥賊攻辰州達魯噶齊和尚擊走之庚子詔加托克托為太師班師還京

十月丁未時享太廟庚戌知樞密院事婁章進金紫光祿  
大夫命平章鼎珠右丞哈瑪爾同知經筵事癸丑和糴粟  
豆五十萬石于遼陽甲寅拜行樞密院事阿乞刺為太  
尉淮南行省平章政事戊午太陰犯鬼宿甲子太陰犯  
歲星乙丑太陰犯亢宿十一月辛未命江浙行省平章  
政事慶童收捕常州賊乙亥以星吉為江西行省  
平章政事出師湖廣丙子中書省請為托克托立徐州  
平寇碑並加封王爵癸未命江浙行省右丞特哩特穆

爾總兵討方國珍己丑以托克托平徐功賜金十錠銀百錠鈔五萬錠幣帛各三千匹上表辭從之庚寅太陰犯太微垣十二月壬寅實達巴圖爾復襄陽辛亥詔以杭常湖信廣德諸路皆克復赦註誤者蠲其夏稅秋糧命有司撫恤其民辛酉以湖廣行省叅知政事巴延布哈右丞鄂爾和討徭賊復湖南潭岳等處有功巴延布哈陞散階從一品鄂爾和陞正二品癸亥托克托言京畿近地水利募江南人耕種歲可得粟麥百餘萬石不

煩海運而京師足食帝曰此事有利于國家其議行之  
是歲海運不通立都水庸田使司于汴梁掌種植之事  
潁州沈邱人察罕特穆爾與信陽州羅山人李思齊同  
起義兵破賊有功授察罕特穆爾中順大夫汝寧府達  
魯噶齊李思齊知汝寧府

元史卷四十二

元史卷四十二考證

至正九年三月乙巳十一年十一月癸丑十二年十二月癸亥 乙巳訛己巳癸丑訛癸酉癸亥訛癸未推干支改

九年秋七月出海壽為陝西廉訪副使韓嘉訥為宣政院使 按韓嘉訥以御史大夫罷為宣政院使仍是內秩原文與出海壽相連而及疑有脫字又十二年三月河南左丞相台哈布哈克復南陽等處以時考

之台哈布哈為河南行省左丞其授左丞相在十四  
年十二月並誤

十二年閏三月立淮南江北等處行中書省治揚州兼  
轄高郵淮安滁州和州廬州安豐安慶蘄州黃州  
兼轄原文作轄揚州按揚州為省治不當言轄從元  
史類編刪改

欽定四庫全書

元史卷四十三

明翰林學士亞中大夫知制誥兼修國史宋濂等修

本紀第四十三

順帝六

十三年春正月庚午朔用帝師請釋放在京罪囚以中書添設平章政事哈瑪爾為平章政事參知政事烏蘭哈達為右丞參知政事烏克遜良楨為左丞詔印造中



統元寶交鈔百九十萬錠至元鈔一十萬錠辛未命烏  
蘭哈達烏克遜良楨兼大司農卿給分司農司印西自  
西山南至保定河間北至檀順州東至遷民鎮凡係官  
地及元管各處屯田悉從分司農司立法佃種合用工  
價牛具農器穀種召募農夫諸費給鈔五百萬錠以供其  
需用旌表真定路藁城縣董氏婦貞節壬申命陝西行  
省平章政事布達實哩為總兵官癸酉享于太廟以皇  
第二子育于太尉重嘉努家賜重嘉努及乳母鈔各千

錠甲戌重建穆清閣乙亥命中書右丞托克托以兵討  
商州賊丙子方國珍復降以司農司舊署賜哈瑪爾庚  
辰中書省言近立分司農司宜於江浙淮東等處召募  
能種水田及修築圍堰之人各一千名為農師教民播  
種宜降空名添設職事勅牒一十二道遣使齎往其地  
有能募農民一百名者授正九品二百名者正八品三  
百名者從七品即書填流官職名給之就令管領所募  
農夫不出四月十五日俱至田所期年為滿即放還家

其所募農夫每名給鈔十錠從之以杜秉彝為中書參知政事乙酉太陰犯太微垣丙戌以武衛所管鹽臺屯田八百頃除軍見種外荒閑之地盡付分司農司達實巴圖爾克復襄陽樊城有功陞四川行省右丞賜金繫腰一庾寅知樞密院事婁章克復南陽唐州賜金一錠銀一十錠鈔一千錠幣帛各五十匹戌戌熒惑太白辰星聚于奎宿二月丁未祭先農己酉太陰犯軒轅庚戌太白犯熒惑壬子太陰犯太微垣甲寅中書省臣言徐

州民願建生祠祀右丞相托克托從之仍立托克托平  
徐勲德碑壬戌以宣政院使都稜特穆爾知經筵事中  
書右丞烏蘭哈達左丞烏克遜良楨參知政事杜秉彝  
並同知經筵事三月己卯命托克托領大司農司甲申  
詔修大承天護聖寺賜鈔二萬錠丁亥命托克托以太  
師開府提調太史院回回漢兒司天監己丑以各署係  
官田地并宗仁等衛屯田地土並付分司農司播種是  
月會州定西靜寧莊浪等州地震命江浙行省左丞特

哩特穆爾江南行臺侍御史尊達實哩招諭方國珍夏四月戊戌朔命南北兵馬司各分官一員就領通州瀋州直沽等處巡捕官兵往來巡邏給分司印一同署事半載一更特命烏克遜良楨得用軍器庚子以禮部所轄掌薪司并地土給付分司農司以甘肅行省平章政事索諾木巴勒為永昌宣慰使總軍馬仍給平章政事俸先是永昌愚魯罷等為亂索諾木巴勒討平之至是復起故有是命辛丑太白犯井宿己巳時享太廟己酉詔取

勘徐州汝寧南陽鄧州等處荒田并戶絕籍沒入官者  
立司牧署掌分司農司耕田又立玉田屯署降徐州路  
為武安州以所轄縣屬歸德府其滕州嶧州仍屬益都  
路辛亥太陰犯房宿是月車駕時巡上都五月己巳命  
東安州武清大興宛平三縣正官添給河防職名從都  
水監官巡視渾河隄岸或有損壞即修理之辛未江西  
行省左丞相琳沁巴勒江浙行省左丞羅羅引兵取道  
自信州元帥韓邦彥哈迷取道由徽州淳梁同復饒州

靳黃等賊聞風皆奔潰癸酉以太尉阿爾奇為嶺北行  
省左丞相知行樞密院事伯嘉努封武國公與諸王博  
囉特穆爾同出軍甲戌行樞密院添設僉院二員乙亥  
太陰犯歲星乙未泰州白駒場亭民張士誠及其弟士  
德士信為亂陷泰州及興化縣遂陷高郵據之僭國號  
大周自稱誠王建元天祐六月丙申朔立詹事院設詹  
事三員同知二員副詹事二員丞二員命四川行省平  
章政事伊蘇烏爾圖華便宜行事丁酉立皇子阿裕爾

實哩達喇為皇太子中書令樞密使授金寶告祭天地  
宗廟命右丞相托克托兼詹事己亥詔征西元帥旺札  
勒南發本處銳勇軍一千人從征以千戶二員百戶十  
員領之庚子知樞密院事實喇巴圖總河南軍四川行  
省右丞達實巴圖爾總四川軍自襄陽分道而下克復  
安陸府辛丑罷宮傳外府以所掌錢帛歸詹事院癸卯  
卯詔以勅牒二十道鈔五萬錠給付淮南行省平章政  
事達實特穆爾於淮南北等處召募壯丁并總領漢軍



蒙古守禦淮安遼東扎雅罕奇塔特昆卓奇雅珠等五十六名及沃濟野人以皮貨來降給扎雅罕等三人銀牌一面管領沃濟野人甲辰以立皇太子詔天下大赦己酉伊都呼高昌王伊魯特穆爾薨于南陽軍中命子僧格襲伊都呼高昌王爵辛亥親王諤勒哲圖泰州陣亡巴圖亳州陣亡各賻鈔五百錠命前河西廉訪副使額森布哈為淮西添設宣慰副使討泰州丙辰詔皇太子位下立儀衛司設指揮二員給二珠金牌副指揮二員一

珠金牌賜吳王吹斯戩金二錠銀五錠鈔二千錠幣帛各九匹以資政院所轄左右都威衛屬詹事院是月命淮南行省平章政事達實特穆爾便宜行事詔淮南行省平章政事福壽討興化是夏薊州大水秋七月丁卯時享太廟泉州天雨白絲海潮日三至戊辰太白晝見宦官至一品二品者依常例給俸祿壬申湖廣行省參知政事鄂爾和復武昌及漢陽府癸酉詔詹事院自行銓注本院屬官壬辰親王濟爾噶呼薨于海寧軍中以

其子寶通繼襲王爵八月癸卯親王奇爾濟蘇特穆爾  
獻馬辛亥賜托克托東泥河田千二頃親王濟爾噶朗  
討捕金山賊薨于軍中命其子圖魯特穆爾入備宿衛  
庚申命布哈特穆爾襲封文濟王是月車駕還自上都  
資政院使托和齊以兵復江州路以四川行省平章政  
事伊蘇烏爾圖華右丞鄂勒哲布哈守鎮中興路左遷  
平章政事耀珠為淮西元帥供給烏撒軍進討蘄黃九  
月乙丑朔日有食之乙亥以集賽官廣平王約約征討

慢功削王爵降為河南行省平章政事己丑廣寧王呼圖克特穆爾薨賻鈔千錠建皇太子盪頂殿于聖安殿西威喇岱僧格實哩獻馬一百匹賜金繫腰一幣帛各九唐寅太白犯熒惑辛卯嘉鼎巴之地獻大薩哈連察察哩密實勒刀弓鎖子甲及青白西馬各二匹賜鈔二萬錠壬辰太白經天熒惑犯左執法南臺御史大夫納琳以老疾辭職從之命太尉如故冬十月丁酉享于太廟庚子太白經天癸卯以江浙行省參知政事敏珠爾

丹陞本省右丞提調明年海運甲辰歲星犯氐宿丁未  
廣西元帥甄崇福復道州誅賊將周伯顏庠成從特哩  
特穆爾尊達實哩之請授方國珍徽州路治中國璋廣  
德路治中國瑛信州路治中督遣之任國珍疑懼不受  
命立水軍都萬戶府於崑山州以浙東宣慰司納琳哈  
喇為正萬戶宣慰使董搏霄為副萬戶庚申賜皇太子  
妃鈔十萬錠壬戌賜皇太子五愛滿集賽台二百五十  
人鈔各一百一十錠癸亥太白犯亢宿是月撤世祖所

立壇殿改建殿宇十一月壬申太陰犯壘壁陣乙酉立  
典藏庫貯皇太子錢帛丁亥江西右丞和尼齊以兵平  
富州臨江遂引兵復瑞州是月立義兵千戶水軍千戶  
所于江西事平願還為民者聽十二月丁酉太白犯東  
咸己亥寧王蘇默格爾還大鄂爾多斯賜金繫腰一鈔  
千錠庚子熒惑入氐宿癸卯托克托請以趙完普家產  
田地賜知樞密院事僧格實哩庚戌京城天無雲而雷  
鳴少頃有火見于東南懷慶路及河南府西北有聲如

擊鼓者數四已而雷聲震地癸丑以豫王喇特納實哩弟達爾瑪討南陽賊有功以豫王前封西安王印與之命鎮成格勒之地丁巳太陰犯心宿西寧王英實鎮守四川還沙州賜鈔一千錠是月大同路疫死者大半江浙行省平章政事已延特穆爾南臺御史中丞曼濟哈雅及四川行省參知政事哈喇圖左丞桑圖實哩西寧王英實合軍討徐壽輝于蘄水敗之壽輝遁走俘獲其偽官四百餘人陝西行省平章政事博囉四川行省右

承達實巴圖爾復均房等州詔博囉守之以達實巴圖爾討東正陽是歲自六月不雨至于八月造清寧殿前山子月宮諸殿宇以宦官留守額森特穆爾留守同知伊蘇岱爾及都水少監陳阿穆爾克等董其役哈瑪爾及圖魯特穆爾等陰進西天僧于帝行房中運氣之術號延徹爾法又進西番僧善秘密法帝皆習之

十四年春正月甲子朔汴梁城東汴河冰皆成五色花草如繪畫三日方解乙丑熒惑犯歲星丁卯太白犯建



星辛未享于太廟壬申命特穆爾布哈襲封廣寧王賜鈔千錠癸酉熒惑犯房宿立遼陽等處漕運庸田使司屬分司農司丁丑帝謂托克托曰朕嘗作都克噶爾好事迎白織蓋遊皇城實為天下生靈之故今命喇嘛選僧一百八人仍作都克噶爾好事凡所用物官自給之毋擾于民丙戌以達爾瑪嘉勒燦遙授陝西行省平章政事實授行宣政院使治西番人民是月命僧格實哩哈喇圖守中興達實巴圖爾復峽州二月戊戌祭社稷

乙卯命中書平章政事吹斯戡提調規運總管府戊午  
太白犯壘壁陣己未以湖廣行省平章政事果勒為淮  
南行省平章政事以兵攻高郵是月以呂思誠為湖廣  
行省左丞命湖廣行省右丞巴延布哈江南行省中丞  
曼濟哈雅江浙行省平章政事巴延特穆爾參知政事  
阿爾烏遜會合湖廣行省平章政事額森特穆爾討沿  
江賊立鎮江水軍萬戶府命江浙行省右丞佛嘉律領  
之詔河南淮南兩省並立義兵萬戶府建清河大壽元

忠國寺以江浙廢寺田歸之三月癸亥朔日有食之己  
巳廷試進士六十二人賜薛朝晤牛繼志進士及第餘  
授官出身有差壬申以皇太子行幸和買駝馬甲戌命  
親王蘇克特穆爾以兵討宿州賊丙子潁州陷是月中  
書定擬義兵立功者權任軍職事平授以民職從之命  
四川行省右丞達實巴圖爾陞本省平章政事兼知行  
樞密院事總荊襄諸軍從宜調遣詔和買馬于北邊以  
供軍用凡有馬之家十匹內和買二匹每匹給鈔一十

錢夏四月癸巳朔汾州介休縣地震泉湧以武祺參議  
中書省事是月車駕時巡上都江西湖廣大饑民疫癘  
者甚衆御史臺臣糾言江浙行省左丞特哩特穆爾等  
罪先是特哩特穆爾與江南行臺侍御史尊達實哩奉  
旨招諭方國珍旋報國珍已降乞立巡防千戶所朝廷  
授以五品流官令納其船散遣徒衆國珍不從擁船一  
千三百餘艘仍據海道阻絕糧運以故歸罪二人以江  
浙行省參知政事阿爾烏遜陞本省右丞浙東宣慰使

恩寧普為江浙行省參知政事皆總兵討方國珍發陝西軍討河南賊給鈔令自備鞍馬軍器合二萬五千人馬七千五百匹永昌鞏昌沿邊人匠雜戶亦在遣中造過街塔於蘆溝橋命有司給物色人匠以御史大夫額森布哈督之復立應昌全寧二路先是有詔罷之以撥屬魯王茂穆蘇王傅府至是有司以為不便復之詔復起永昌鞏昌南已臨洮等處軍命各衛軍人修白浮鳧山等處隄堰五月甲子安豐正陽賊圍廬州是月詔修

砌北巡所經色珍嶺黑石頭河西沿山道路敝建龍門  
等處石橋皇太子徙居宸德殿命有司修葺之立南陽  
鄧州等處毛胡蘆義兵萬戶府募土人為軍免其差役  
令討賊自効因其鄉人自相團結號毛胡蘆故以名之  
詔以伊蘇烏爾圖華募兵萬人下蜀江代達實巴圖爾  
守中興荆門命達實巴圖爾以兵赴汝寧陞湖廣行省  
參知政事鄂爾和為右丞討廬州募寧夏善射者及各  
處回回珠赫殷富者赴京師從軍復發圖卜軍萬人命

太傅昂吉爾領之命荆王達爾瑪實哩代奎騰阿哈鎮河西討西番賊六月辛卯朔薊州雨雹高郵張士誠寇揚州丙申達實特穆爾以兵討張士誠敗績諸軍皆潰詔江浙行省參知政事佛嘉律會達實特穆爾復進兵討之甲辰太陰入斗宿己酉盱眙縣陷庚戌陷泗州官軍潰秋七月甲子潞州襄垣縣大風拔木偃禾乙丑太陰犯角宿壬申詔免大都上都興和三路今年稅糧命刑部尚書阿魯於汝寧州等處募兵討泗州壬午太陰

犯昴宿是月汾州孝義縣地震八月冀寧路榆次縣桃李花車駕還自上都九月己未朔賜親王薩爾巴達實金二錠銀二十錠鈔萬錠幣帛表裏各三百匹創設教拉齊二十名仍給衣糧草料庚申以湖廣行省左丞呂思誠復為中書左丞辛酉以知樞密院事伊徹察喇為中書平章政事詔托克托以太師中書右丞相總制諸王各愛滿諸省各翼軍馬及總兵領兵大小官出征高郵甲子封高麗王托克托布哈為瀋王丁卯已延呼圖



克皇后母歿賻鈔三百錠立寧宗影堂戊子免河南蒙  
右軍人雜泛差役是月賜穆清閣工匠皮衣各一領蓋  
海青鷹房禁河南淮南酒階州西番賊起遣兵擊之方  
國珍拘執元帥伊德默色黃巖州達嚕噶齊宋巴延布  
哈知州趙宜浩以俟詔命冬十月甲午享于太廟戊戌  
詔達實巴圖爾及台哈布哈等會討安豐甲辰詔加號  
海神為輔國護聖庇民廣濟福惠明著天妃壬子太陰  
犯太微垣十一月丙寅勅中書省樞密院御史臺凡奏

事先啟皇太子詔江浙應有諸王公主后妃寺觀官員撥賜田糧及江淮財賦稻田營田各提舉司糧盡數赴倉聽候海運以備軍儲價依本處十月時估給之丁卯托克托領兵至高郵辛未戰于高郵城外大敗賊衆丙子太陰犯鬼宿癸未賜親王諾木達實金鍍銀印乙酉托克托遣兵平六合縣是月達實巴圖爾復苗軍所據鄭均許三州皇太子修佛事釋京師死罪以下囚十二月辛卯絳州北有紅氣如火蔽天丙申以中書平章政

事鼎珠為左丞相宣政院使哈瑪爾永昌宣慰索諾木  
巴勒並為中書平章政事進階光祿大夫監察御史素  
賽音布哈等劾托克托出師三月略無寸功傾國家之  
財為己用半朝廷之官以自隨其弟額森特穆爾庸材  
鄙器玷汙清臺綱紀之政不修貪淫之心益著章三上  
詔令額森特穆爾出都門聽旨以宣徽使旺嘉努為御  
史大夫丁酉詔以托克托老師費財已逾三月坐視寇  
盜恬不為意削托克托官爵安置淮安弟御史大夫額

森特穆爾安置寧夏以河南行省平章政事台哈布哈  
為本省左丞相中書平章政事伊徹察喇加太尉集賢  
大學士舒蘇知樞密院事同總兵領諸處征進軍馬并  
在軍諸王駙馬省院臺官及大小出軍官其密喇卜伊  
實尼桑哈瑪爾圖哈卜齊勒等已圖爾伊勒都齊推勒  
齊哩克鄂博克西番軍各愛滿圖烈齊高麗回回民義  
丁壯等軍人並聽總兵官節制詔被災殘破之處令有  
司賑恤仍蠲租稅三年賜高年帛罷庸田茶運寶泉等

司戊戌以鼎珠領經筵事中政院使僧格實哩為中書  
添設右丞己亥太陰掩昴宿庚子以僧格實哩同知經  
筵事冀國公圖魯加太尉進階金紫光祿大夫癸卯命  
哈瑪爾提調經正監都水監會同館知經筵事就帶元  
降虎符甲辰以僧格實哩提調宣文閣哈瑪爾兼大司農  
呂思誠兼司農卿提調農務己酉紹興路地震是月命  
織造世祖御容詔威順王庫春布哈還鎮湖廣先是以  
賊據湖廣奪其王印至是庫春布哈討賊累功故詔還


其印仍守舊鎮命甘肅右丞威台討捕西番賊達實巴圖爾復河陰鞏縣徭賊自耒陽寇衡州萬戶許托音死之是歲詔諭民間私租太重以十分為率普減二分永為定例降鈔十萬錠賞江西守城官吏軍民京師大饑加以疫癘民有父子相食者帝於內苑造龍船委內官供奉少監塔斯布哈監工帝自製其樣船首尾長一百二十尺廣二十尺前瓦簾棚穿廊兩暖閣後吾殿樓子龍身并殿宇用五彩金粧前有兩爪上用水手二十四

人身衣紫衫金荔枝帶四帶頭巾于船兩旁下各執篙  
一自後宮至前宮山下海子內往來游戲行時其龍首  
眼口爪尾皆動又自製宮漏約高六七尺廣半之造木  
為匱陰藏諸壺其中運水上下匱上設西方三聖殿匱  
腰立玉女捧時刻籌時至輒浮水而上左右列二金甲  
神一懸鐘一懸鈺夜則神人自能按更而擊無分毫差  
當鐘鈺之鳴獅鳳在側者皆翔舞匱之西東有日月宮  
飛僊六人立宮前遇子午時飛僊自能耦進度僊橋達

三聖殿已而復退立如前其精巧絕出人謂前代所鮮  
有時帝怠于政事荒于游宴以官女三聖努妙樂努文  
殊努等一十六人按舞名為十六天魔首垂髮數辨戴  
象牙佛冠身被纓絡大紅綃金長短裙金雜襖雲肩合  
袖天衣綬帶鞋襪各執喇布喇盆之器內一人執鈴杵  
奏樂又宮女一十一人練槌髻勒帕常服或用唐帽窄  
衫所奏樂用龍笛頭管小鼓箏琵琶笙胡琴響板拍  
板以官者察罕岱布哈管領遇宮中讚佛則按舞奏樂



官官受祕密戒者得入餘不得預



元史卷四十三

元史卷四十三考證

至正十三年春正月庚午朔以中書添設平章政事哈瑪爾為平章政事烏蘭哈達為右丞 按哈瑪爾傳

至正十二年八月為添設右丞十三年正月正除八月改宣政院使十四年十二月為平章政事宰相表並同紀與表傳不符且上卷十二年八月紀曾書哈瑪爾為添設右丞又與前書互異再按宰相表烏蘭哈達代哈瑪爾為左丞在是年正月正除在四月則

此處右丞上亦應有添設字今姑仍原文

太尉阿爾奇江浙行省參政阿爾烏遜湖廣行省參政

鄂爾和中書平章伊徹察喇 阿爾奇原文阿吉刺

此作阿刺吉阿爾烏遜原文阿里溫沙此作阿兒溫

沙鄂爾和原文阿魯輝此作阿兒灰伊徹察喇原文

月赤察兒此作月闊察兒俱係一人並畫一改

六月庚子平章政事達實巴圖爾總四川軍 按上文

及達實巴圖爾本傳是年正月為四川行省右丞不

應稱平章政事今改正

冬十月丁酉享於太廟庚子太白經天 按九月乙丑朔至丁酉已三十三日原文倒置冬十月於太白經天之下元史類編遂譏是冬闕享太廟是未考前文而覈干支也今改正

癸丑以豫王喇特納實哩弟達爾瑪討南陽賊有功以西安王印與之 按喇特納實哩文宗天歷初已由西安王進封豫王至此以西安王封其弟紀誤書以

西安王喇特續實哩為豫王今改

欽定四庫全書

史部

元史卷

四十四至  
四十六

御史<sub>臣</sub>徐如澍覆勘

總校官編修<sub>臣</sub>朱鈐

欽定四庫全書

元史卷四十四

明翰林學士亞中大夫知制誥兼修國史宋濂等修

本紀第四十四

順帝七

十五年春正月戊午朔以中書平章政事吹斯戡提調  
留守司宣徽使哈斯為中書平章政事河南行省左丞  
許有壬為集賢大學士遼陽行省左丞奇爾巴延布哈

陞本省平章政事壬戌以宣政院副使實都為太子詹  
事癸亥享於太廟甲子親王圖沁特穆爾歿於軍中賜  
鈔五百錠江西行省平章政事道通加大司徒戊辰太  
陰犯五車辛未太陰犯鬼宿大鄂爾多儒學教授鄭咍  
建言蒙古乃國家本族宜教以禮而猶循本俗不行三  
年之喪又收繼庶母叔孀兄嫂恐貽笑後世必宜改革  
繩以禮法不報丙子上都饑賑糴米二萬石丁丑徐壽  
輝偽將倪文俊復陷沔陽府威順王庫春布哈令王子



報恩努等同湖南元帥阿爾斯蘭水陸並進討之至漢  
川水淺文俊用火筏燒船報恩努遇害庚辰復設仁虞  
雲需尚供三總管府丙戌大同路饑糶糧萬石減其價  
是月以湖廣行省平章政事奇爾巴爾慢功削其官爵  
令從軍自効詔安置托克托于額齊訥路收所賜田土  
命河南行省參知政事洪超爾守禦河南陝西行省參  
知政事舒魯多爾濟守禦潼關宗王嘉木揚實哩守禦  
興化陝西行省參知政事阿魯烏遜守禦商州通政院

使多喇守禦山東詔豫王阿喇特納實哩與陝西行省  
平章政事吹斯戩從宜商議軍事閏月壬寅以各衛軍  
人屯田京畿人給鈔五錠以是日入役日支鈔二兩五  
錢仍給牛種農器命司農司令本管萬戶督其勤惰丙  
午太陰犯心宿丙辰太白經天是月上都路饑詔嚴酒  
禁命河南行省參知政事達實特穆爾領元管陝西軍  
馬守禦河南二月己未劉福通等自碭山夾河迎韓林  
兒至立為皇帝又號小明王建都亳州國號宋改元龍

鳳以其母楊氏為皇太后杜遵道盛文郁為丞相羅士  
素劉福通為平章劉六知樞密院事拆鹿邑縣太清  
材建宮闕遵道等各遣子入侍遵道得寵專權劉福通  
疾之命甲士搃殺遵道福通遂為丞相後稱太保丙寅  
以中書平章政事哈斯左丞許有壬並知經筵事戊辰  
命太傅御史大夫旺嘉努為中書右丞相中書平章政  
事鼎珠為左丞相詔天下庚午以河南行省平章政事  
約約為遼陽行省左丞相壬申立淮東等處宣慰使司

都元帥府於天長縣統濠泗義兵萬戶府并洪澤處  
義兵聽富民願出丁壯義兵五千名者為萬戶五百  
者為千戶一百名者為百戶仍降宣勅牌面丙子以  
實特穆爾為中書平章政事提調留守司平章政事  
斯兼大司農是月命刑部尚書董銓等與江西行省  
章政事和尼齊專任征討之務便宜從事遣使先降  
赦諭以禍福如能出降釋其本罪執迷不悛尅日進  
三月庚寅太陰犯五車癸巳徐壽輝兵陷襄陽路甲午

命旺嘉努攝太尉持節賜皇太子阿裕爾實哩達喇玉冊并冕服九旒祇謁太廟丙申太陰犯房宿辛丑以監察御史言安置托克托于雲南鎮西路額森特穆爾于四川碉門托克托長男哈喇章安置肅州次男三寶努安置蘭州仍籍其家產己酉命知樞密院事重嘉努知經筵事知樞密院事尼蘇該提調內史府癸丑太白經天夏四月壬戌中書省臣言江南因盜賊阻隔所在闕官宜遣人與各省及行臺官以廣東廣西海北海南三

品以下通行遷調五品以下先行照會之任江浙行省  
三年一次遷調福建等處闕官亦依前例從之命彰德  
等處分樞密院添設同知副使都事各一員癸亥以中  
書平章政事達實特穆爾知經筵事命樞密院添設僉  
院一員判官二員直沽分樞密院添設副使一員都事  
一員以御史中丞扎薩古遜同知經筵事乙丑以中書  
右丞藏實左丞烏克遜良楨分省彰德辛未命御史中  
丞伯嘉努同知經筵事中書參議成遵兼經筵官癸酉

以左丞相鼎珠為右丞相平章政事哈瑪爾為左丞相  
太子詹事僧格實哩為中書平章政事舒蘇為御史大  
夫丁丑加知樞密院事重嘉努太傅辛巳親王托克托  
薨賜鈔二百錠是月車駕時巡上都詔翰林待制烏瑪  
喇集賢待制孫撫招安高郵張士誠仍齎宣命印信牌  
面與鎮南王博囉布哈及淮南行省廉訪司等官商議  
付之御史臺劾中書左丞呂思誠罷之詔四川等處立  
宣化鎮南軍民府改四川忠孝軍民府為忠孝軍民安

撫司罷盤順府改立盤順軍民安撫司罷四川羊母甲  
洞臭南王洞長官司改立忠義軍民安撫司立汴梁等  
處義兵萬戶府五月壬辰復襄陽路監察御史伊埒呼  
圖克等劾河南行省左丞相台哈布哈慢功虐民詔削  
其官仍令領和實衮從總兵官平章政事達實巴圖爾  
征進達實巴圖爾領台哈布哈一應軍馬庚戌倪文俊  
自沔陽陷中興路元帥多爾濟巴勒死之是月命淮南  
行省平章政事耀珠淮東廉訪使王額森岱爾撫諭高



郵六月丙辰命御史大夫舒蘇提調端本堂癸亥太白  
經天丁卯監察御史哈喇圖劾托克托之師集賢大學  
士吳直方及其參軍海罕長史浩爾齊等並宜追奪從  
之監察御史烏格等辯明中書左丞呂思誠給付元追  
所授宣命玉帶戊辰命中書平章政事吹斯戩兼大司  
農僧格實哩知經筵事己巳靖安王扣布哈薨無後命  
其姪襲封靖安王癸酉以四川行省平章政事達實巴  
圖爾為河南行省平章政事乙亥命將作院判官烏瑪

喇招安濠泗等處章佩監丞布延特穆爾招安沔陽等處諸王達烏歿於軍中賻鈔二百錠丁丑保德州地震已卯陝西行省平章政事托克托加達爾罕庚辰徵徵州隱士鄭玉為翰林待制不至江浙省臣言至正十五年稅課等鈔除詔書已免稅糧等鈔較之年例海運糧并所支鈔不敷乞減海運以甦民力戶部定擬本年稅糧除免之外其寺觀并撥賜田糧十月開倉盡行拘收其不敷糧撥至元折中統鈔一百五十萬錠于產米處

糴一百五十萬石貯瀕河之倉以聽撥運從之癸未中書參知政事實勒們言舊立蒙古國子監專教四集賽并各愛滿官員子弟今宜諭之依先例入學俾嚴為訓誨從之是月大明皇帝起兵自和州渡江取太平路自紅巾妖寇倡亂之後南北郡縣多陷沒故大明從而取之荊州大水命湖廣行省平章政事鄂爾和領軍與淮南行省平章政事曼濟哈雅淮西道宣慰使諤勒哲布哈攻和州等處命郡王濟爾噶巴湖廣行省右丞布呼

齊攻討河南以湖廣行省平章政事耀珠為總兵官領  
本省軍馬并江州楊諤勒哲黃州李勝等軍守禦湖廣  
江浙行省參知政事納琳哈喇統領水軍萬戶等軍會  
本省平章政事鼎鼎進攻常州鎮江等處命將作院判  
官烏瑪喇利用監丞巴實努招諭濠泗淮南行省左丞  
相太平助之章佩監丞布延特穆爾翰林修撰埒克戩  
招諭沔陽四川行省平章政事伊蘇烏爾圖華等助之  
以集賽台普爾普等六十名從江南行御史臺大夫福

壽守禦集慶路國王多爾濟薨于揚州軍中命郡王濟爾噶巴領其所部軍馬秋七月辛卯享于太廟壬寅倪文俊復陷武昌漢陽等處是月命親王實勒們以兵守曹州山東宣慰使劉達卓分守沂州莒州等處命知樞密院事達爾瑪嘉勒燦及四川行省左丞實喇卜湖南同知宣慰使劉達爾瑪實哩以兵屯中興招諭諸處有不降者與親王圖魯及伊蘇烏爾圖華討之命湖廣行省平章政事僧格伊特袞及托克托守禦襄陽參知政

事哈喇圖及王達實特穆爾守禦沔陽如賊不降即進  
兵討之陞台州海道巡防千戶所為海道防禦運糧萬  
戶府八月庚申命南陽等處義兵萬戶府召募毛胡蘆  
義兵萬人進攻南陽戊辰以中書平章政事達實特穆  
爾為江浙行省左丞相便宜行事賜鈔一千錠甲戌以  
大宗正府扎爾古齊德呼默色為甘肅行省平章政事  
戊寅太白經天雲南死可伐等降令其子莽三以方物  
來貢乃立平緬宣撫司四川向思勝降以安定州改立

安定軍民安撫司是月車駕還自上都詔淮南行省左丞相太平統淮南諸軍討所陷郡縣仍命湖廣行省平章政事鄂爾和以所部苗軍聽節制立沃濟野人濟喇敏等處軍萬戶府于哈勒費延命親王庫春巴爾守興元永昌宣慰使諤勒哲特穆爾討西番賊以淮南行省平章政事曼濟哈雅與同知樞密院事班珠爾瑪克等自蕪湖至鎮江南岸守禦同鄂爾和部軍協護江南行臺命達實巴圖爾從便調度湖廣行省左丞布埒齊所

領苗軍江浙行省平章政事布延特穆爾守禦蘄黃蘭  
溪等處九月癸未朔命吹斯戩提調武衛以知嶺北行  
樞密院事努都爾噶為中書平章政事乙酉立分海道  
防禦運糧萬戶府于平江路己丑太白犯太微垣辛卯  
命祕書卿達蘭提調布濟克太后影堂祭祀知樞密院  
事額森特穆爾提調世祖影堂祭祀宣政院使曼濟提  
調裕宗英宗影堂祭祀己亥倪文俊圍岳州路壬子命  
僧格實哩提調宣文閣呂思誠知經筵事集賢大學士



許有壬兼太子諭德是月移托克托于阿恰齊之地命  
達實巴圖爾移軍住陳留冬十月丁巳立淮南行樞密  
院於揚州己未太陰犯壘壁陣甲子命兵工二部尚書  
實巴爾王安圖以金銀牌百六十五面給淮東宣慰使  
司等處義兵官員命哈瑪爾領大司農司帝謂右丞相  
鼎珠等曰敬天地尊祖宗重事也近年以來關於舉行  
當選吉日朕將親祀郊廟務盡誠敬不必繁文卿等其  
議典禮從其簡者行之遂命右丞鄂蘭左丞呂思誠領

其事以中書右丞拜珠為平章政事庚午以襲封衍聖公孔克堅同知太常禮儀院事以克堅子希學襲封衍聖公癸酉太陰犯軒轅哈瑪爾奏言郊祀之禮以太祖配皇帝出宮至郊祀所便服乘馬不設內外儀仗教坊隊子齊戒七日內散齋四日於別殿致齋三日二日於大明殿西幄殿一日在南郊祀所丙子以郊祀命皇太子阿裕爾實哩達喇祭告太廟已卯以翰林學士承旨慶通為淮南行省平章立黃河水軍萬戶府于小清口

十一月甲申癸亥犯氐宿庚寅填星犯井宿壬辰親祀上帝於南郊以皇太子阿裕爾實哩達喇為亞獻攝太尉右丞相鼎珠為終獻甲午以台哈布哈為湖廣行省左丞相總兵招捕湖廣沔陽等處湖廣荆襄諸軍聽節制給還元追奪河南行省丞相宣命仍給以功賞宣勅金銀牌面戊戌介休縣桃花已亥太陰犯鬼宿戊申右丞相鼎珠以病辭職命以太保就第治病庚戌賊陷饒州路辛亥賜高麗國王巴延特穆爾為親仁輔義宣

忠奉國彰惠靖遠功臣是月達實巴圖爾攻夾河賊大破之賊陷懷慶命河南行省右丞布哈討之以湖廣歸州改隸四川行省十二月壬子朔癸亥犯房宿給湖廣行省分省印丁巳命中書參知政事伊呀森布哈陳敬伯分省彰德癸亥立忠義忠勤萬戶府於宿州武安州己巳以諸郡軍儲供餉繁浩命戶部印造明年鈔本六百萬錠給之壬申以平章政事特哩特穆爾右丞鄂蘭並知經筵事參議丁好禮兼經筵官乙亥以天下兵起

下詔罪已大赦天下是月達實巴圖爾大敗劉福通等  
於太康遂圍亳州偽宋主遁於安豐立興元等處宣慰  
使司都元帥府於興元路是歲薊州雨血詔凡有水田  
之處設大兵農司招集人夫有警垂機進討無事栽植  
播種詔濬大內河道以宦官同知留守額森特穆爾董  
其役額森特穆爾言自十一月以來天下多事不宜興  
作帝怒命往使高麗改命宦官達實密董之以中書平  
章政事拜珠分省濟寧設四部是歲察罕特穆爾與賊

戰於河南北屢有功除中書刑部侍郎

十六年春正月壬午朔改福建宣慰使司都元帥府為  
福建行中書省戊子親享太廟命中書平章政事特哩  
特穆爾提調國子監己丑太陰犯昴宿丁酉太保鼎珠  
以病辭職太尉大宗正府扎爾古齊伊徹察喇以中陣  
傷辭職皆不允己亥詔命太尉昂吉爾開府設官屬乙  
巳以遼陽行省左丞相約約為太子詹事翰林學士承  
旨圖烈特穆爾同知詹事院事丙午以知樞密院事實

勒們兼太府監卿戊申雲南土官阿蘆降遣姪腮幹來  
貢方物庚戌左丞相哈瑪爾罷辛亥御史大夫舒蘇亦  
罷以吹斯戩為御史大夫復以鼎珠為右丞相是月薊  
州地震倪文俊建偽都於漢陽迎徐壽輝據之二月癸  
丑圖魯特穆爾辭職不允吹斯戩糾言哈瑪爾及其弟  
舒蘇等罪惡帝曰哈瑪爾兄弟雖有罪然侍朕久與朕  
弟伊埒哲伯皇帝實同乳且緩其罰令出征自效甲寅  
命右丞相鼎珠依前太保中書一切機務悉聽總裁詔

天下丙辰以鎮南王博囉布哈自兵興以來率集賽台討賊累立戰功賜鈔萬錠鼎珠及平章政事僧格實哩等復奏哈瑪爾兄弟罪惡乃貶哈瑪爾惠州安置舒蘇肇州安置尋杖殺之壬戌詹事已咱爾辭職乙丑禁銷毀販賣銅錢丙寅命翰林國史院太常禮儀院定擬皇后奇氏三代功臣謚號王爵甲戌命六部大司農司集賢翰林國史兩院太常禮儀院祕書崇文國子都水監侍儀司等正官各舉才堪守令者一人不拘蒙古色目



漢南人從中書省斟酌用之或任內害民受賊者舉官  
量事輕重降職命滿滿為靖安王賜金印置王傅等官  
己卯命集賢直學士楊俊民致祭曲阜孔子廟仍葺其  
廟宇詔諭山東鹽法軍民毋得沮壞賜鼎珠都呀齊集  
賽台三十名給衣糧馬匹草料是月高郵張士誠陷平  
江路據之改平江路為隆平府遂陷湖州松江常州三  
月辛巳朔復立酒課提舉司命中書平章政事特哩特  
穆爾參知政事成遵等議鈔法壬午徐壽輝復寇襄陽

癸未臺臣言係官牧馬地俱為權豪所占今後除規運  
總管府見種外餘盡取勘令大司農召募耕墾歲收租  
課以資國用從之丁亥以今秋出師詔和買馬六萬匹  
戊子命宣讓王特穆爾布哈威順王庫春布哈以兵鎮  
遏懷慶路各賜金一錠銀五錠幣帛九匹鈔二千錠庚  
寅大明兵取集慶路江南行臺御史大夫福壽死之丙  
申倪文俊陷常德路總兵官溫都爾遁命吹斯戩提調  
承徽寺丁酉立行樞密院于杭州命江浙行省左丞相

達實特穆爾兼知行樞密院事節制諸軍省院等官並  
聽調遣凡賞功罰罪招降討逆許以便宜行事大明兵  
取鎮江路戊申方國珍復降以為海道運糧漕運萬戶  
兼防禦海道運糧萬戶其兄方國璋為衢州路總管兼  
防禦海道事是月有兩日相盪夏四月辛亥以吹斯戩  
為中書左丞相丙辰以資正院使布哈為御史大夫丁  
巳命左丞相吹斯戩領經筵事中書平章政事烏蘭哈  
達御史大夫布哈並知經筵事庚申以河南行省左丞

布呼齊為湖廣行省平章政事達實巴圖爾加金紫光祿大夫丙寅命安班太子與陝西行省官同討均房南陽遼陽行省平章政事爾巴延布哈加大司徒丁卯以陝西行臺御史大夫托多為陝西行省左丞相大司農約約為遼陽行省左丞相以知樞密院事實勅們分院濟寧翰林學士承旨托克托同知詹事院事壬申命豫王阿喇特納實哩與陝西行省官商議攻討機宜己卯命烏蘭哈達兼太子諭德是月車駕時巡上都五月壬

辰太白犯鬼宿癸巳亦如之甲午太陰入斗宿丙申倪  
文俊陷澧州路丁酉太陰犯壘壁陣乙巳賊寇辰州守  
將和尚以鄉兵擊敗之六月甲寅江浙行省平章政事  
薩木丹巴參知政事楊諤勒哲以兵守嘉興路禦張士  
誠乙丑大明兵取廣德路秋七月癸未以翰林學士圖  
魯特穆爾為侍御史丁酉太陰犯壘壁陣是月張士誠  
遣兵陷杭州江浙行省平章政事尊達實哩戰死丞相  
達實特穆爾遁楊諤勒哲及萬戶普賢努擊敗之復其

城八月丙辰奉元路判官王淵等以義兵復商州陞淵  
同知關商襄鄧等處宣慰司事己未賊侵河南府路參  
知政事洪超爾以兵敗之丁卯太陰犯昴宿庚午倪文  
俊陷衡州路元帥甄崇福戰死甲戌彗星見張宿色青  
白彗指西南長尺餘至十二月戊午始滅是月車駕還  
自上都黃河決山東大水九月庚辰汝潁賊李武崔德  
等破潼關參知政事舒魯杰戰死壬午豫王阿喇特納  
實哩同知樞密院事鼎珠引兵復潼關河南行省平章

政事伯嘉努以兵守之丙申潼關復陷於賊伯嘉努兵潰豫王阿喇特納實哩復以兵取之李武崔德敗走戊戌賊陷陝州及虢州詔以太尉納琳復為江南行臺御史大夫遷行臺治紹興是月察罕特穆爾復陝州及虢州復襲敗賊兵于平陸安邑以功由兵部尚書陞僉河北行樞密院事冬十月丁未大名路有星如火從東南流芒尾如曳篲墮地有聲火燄蓬勃久之乃息化為石青黑色光瑩形如狗頭其斷處如新割者命藏于庫壬

辰太陰犯井宿是月詔罷太尉額森特穆爾十一月丙戌以魯達實達爾瑪實哩並為詹事丁亥流星大如酒盃色青白尾跡約長五尺餘光燭地起自西北東南行没于近濁有聲如雷壬辰太陰犯井宿是月河南臨河南廉訪副使溫普遁置河南廉訪司于沂州又於沂州設分樞密院以兵馬指揮使隸之十二月倪文俊陷岳州路殺威順王子岱音特穆爾湖廣參知政事額森特穆爾與左江義兵萬戶鄧祖勝合兵復衡州是歲詔沿



海州縣為賊殘掠者免田租三年賜高年帛河南行省  
左丞相台哈布哈駐軍於南陽嵩汝等州叛民皆降軍  
勢大振陝西行臺監察御史李尚綱上關中形勝急論  
凡十有二事命大司農司屯種雄霸二州以給京師號  
京糧

元史卷四十四

元史卷四十四考證

至正十五年春正月以中書平章政事綽斯戩為提調  
留守司 按綽斯戩傳提調留守司在復入中書時  
事宰相表繫於是年九月於正月則書出為陝西平  
章表傳參觀紀所載似有訛漏

三月庚寅太陰犯五車丙申太陰犯房宿 天文作志  
五月丙申推靈臺儀象五車星距房宿一百七十餘  
度太陰平行每日十三度自庚寅犯五車至此纔七

日去房尚遠疑係五月丙申也又是年正月丙午太陰犯心宿天文志作丁未十一月甲申熒惑犯氐宿天文志作乙酉並干支不符

夏四月癸酉平章政事哈瑪爾為左丞相 哈瑪爾傳  
作五月

六月庚辰徵徽州隱士鄭玉為翰林待制 按本傳玉被徵在十四年汪克寬作玉行狀亦書其事為至正十四年六月

九月癸未朔十六年春正月壬午朔三月辛巳朔 各  
按本月及前後甲子增朔字又十六年正月己亥丙  
午癸丑日原本訛乙亥丙子癸酉並推改

十月壬辰太陰犯井宿 天文志同載推干支是月不  
應有壬辰日當即下文十一月之壬辰太陰犯井而  
誤書於此者存之以志闕疑

